

Ukiumoortumik nalunaarusiaq 2023

AQQUT

www.aqqut.gl

AQQUT
Imaneq 24B, 2. sal
3900 Nuuk
Grønland

Imarisai

Aallaqqaasiut	4
Aaqqissuussaaneq	5
2023-IMI SAMMISAT	6
Ilinniartitaaneq pillugu paasititsiniaalluni angalaneq	6
AQQUT-mi sulisut katersuuttarnerat	6
Aqutissiuussinnermut tunngatillugu iliuusissanut pilersaarut	6
Aqutissiuussisut ataatsimeersuarnerat	7
AQQUMMUT QULLEQ	8
Ilinniartitaanermut immikkoortortaq	8
Sammisat naammassineqartut	9
E-læring	10
GUX-S	10
Aqutissiuussinnermut immikkoortortaq	12
eVejledning	13
Nittartagaq	14
Filmit	14
Tusarnaagassiat/Podcast	14
Attaveqatigiinni ataatsimiinnerit	15
Sulinermit atatillugu angalanerit	16
QINNGORNEQ	18
Saaffigisat	19
Katsorsaanermut atatillugu paasissutissat	20
Pingaarnertut suliniutaasoq	20
Qinnuteqaatit	20
Oqaloqatigiinnerit amerlassusaat	21
Suiassuseq	22
Katsorsartinnissamut neqeroorummi ajornartorsiutit	22
Katsorsartinnissamut utaqqineq	23
Ingerlanerani naliliineq	23
Katsorsaanissamut toqqammavissiineq	24
Suliniut Mindhelper.gl	25

Piffissaqarnermi/kajuminnermi qarasaasiakkut ikorfartoqatigiinneq	25
Annaasaqarsimasunut qarasaasiakkut tapersersoqatigiiffik	26
Annilaanganermik ajornartorsiutilinnut tapersersoqatigiiffik.....	28
Innersuunneqarani siunnersortinnissamut neqeroorut	28
Aallartisarneq	29
Ukioq qaangiuttoq eqikkaavigalugu	29
Ilanngussaq 1	31
Ilanngussaq 2	34

Aallaqqaasiut

2023-mi ukiumoortumik nalunaarusiami AQQUT-mi suliat qiterisaannik suliaqarneq ukkanneqarpoq ukiullu ingerlanerani sammisanik suliniutinillu imaqlarluni. Ukiumoortumik nalunaarusiami matumani aallaavigineqartussat tassaapput aqqutissiuussinermut tunngatillugu iliuusissanut pilersaarummi anguniagassatut siunniussat aappaat pingajuallu tassaasut:

1. Innuttaasut ataasiakkaat **imminnut ilikkarnissaat** taamaallutillu ilinniakkamik suliffissamillu toqqaanissamut piginnaaneqalernissaat siunertarlugu **aqqutissiuussinerup** nukittorsarnissaa.
 - *Aqqummut Qulleq*
2. Ilinnialertussat ataasiakkaat, **aqqutissiuussinerup** inuttut ineriartornikkut kiisalu inuttut atukkatigut tarnillu pissusaagut siunnersorneqarnikkut, **eqqarsartaatsikkut peqqissutsip ilikkarnissaata** nukittorsarnissaa.
 - *Qinngorneq*

AQQUT-mi suliat qiterisaat tassaapput – aqqutissiuussinermut qitiusumik akisussaaffik Aqqummut Qulleq-mit isumagineqartoq, katsorsaanermilu ilinniartunik ataasiakkaanik oqaloqateqarnerit, Qinngorneq-mit isumagineqartut. Akisussaaffiup tamatuma sutigut tamatigut pisussaaffilerpaatigut. Suliat qiterisaannik ukkassiuarnissaq pingoqqaatittalusooq ilagaa. Taamaammat suliniutinik assigiinngitsunik naapertuuttunik, suliat qiterisaannut anguniakkatullu siunniussanut ikorfartuutaasunik, aallartitsinissaq suliniutigaarput. Ukioq nutaanik, pissanganartunik, initusimaqisunik ukiunilu aggersuni initujumaartussanik suliniuteqarfiuvoq inerisaaviullunilu.

2023 tassaavortaaq nittartakkatta nutarterlugu paasilertoruminarsakkap kiisalu www.mindhelper.gl naammassineqarfia, 2023-ip naalernerani atorineqarsinnaanngorpoq suliniullu taanna, assut tulluusimaarutigisarpot, atorluarumaarissi neriutigaarput.

Illit matuminnga atuartutut oqaaseqaatissaqaruit imal. suliarput pillugu annertunerusunik paasisaqarusukkuit, saaffiginninnissannut tamatigut tikilluaqqusaavutit. Attavissat pillugit paasisutissat nittartakkatsinni: www.aqqut.gl pissarsiarisinnaavatit.

Naggataagut 2023-imi suleqatigisimasagut tamaasa AQQUT-mit qutsavigerusuppagut.

Atuarluarisi!

Aaqqissuussaaneq

2023-imi pisortatigoortumik AQQUT-mik ateqalernerput maaniittugut saqqummiutissallugu qilanaarisimavarput.

Tamatuma peqatigisaanik AQQUT-mi immikkoortortat marluk, unammisitsinikkut aqqi allanngortinneqartut, tassaapput:

- Inerisaanermut Aqqutissiuussinermullu immikkoortortaq: Aqqummut Qulleq
- Ilinniartunut Siunnersuisarfik: Qinngorneq

AQQUT marlunnik immikkoortortaqarpoq qullersamullu siunnersuisarfeqarluni; Aqqummut Qulleq aamma Qinngorneq. Inerisaanermi suliniutini qarasaasiarsornermik immikkut ilisimasaqarnissamik piumasaqaatalinni, avataaneersumik suleqateqarpugut.

2023-imi decembarip ulluisa aallaqqaataanniit AQQUT tarnip pissusaanik immikkut ilisimasalittut pisortaqanngilaq Qinngornermilu aqutsineq tarnip pissusaanik immikkut ilisimasalittut atorfiup inuttalernissaata tungaanut atorfinikkallartitami isumagineqarluni.

Aaqqissuussaaneermut takussutissiaq:



2023-IMI SAMMISAT

Ilinniartitaaneq pillugu paasititsiniaalluni angalaneq

AQQUT; ilinniartitaaneq pillugu paasititsiniaalluni angalanermik, nunatsinni illoqarfinnut annerusunut ilinniartoqarfiusunut angalanernik ukiut tamaasa aaqqissuussisarpog. Ullut ilinniartitaaneq pillugu paasititsiniaalluni angalaffissat AQQUT-mit aalajangerneqartarput.

Sap. ak. 43-imi ilinniartitaaneq pillugu paasititsiniaalluni angalaneq avannaani Ilulissani aallartippoq, Aasiannut ingerlaqqeriarluni Sisimiunut- naggataagullu Nuummur pilluni. Ajorluartumik silap ajornera pissutaalluni Qaqortoq angumerineqanngitsoorpoq. Ilinniartitaaneq pillugu paasititsiniaalluni angalaneq iluatsilluarpoq naak Ilulissani innaallagissamik qamittoortoqaraluartoq, ilinniartitaaneq pillugu paasititsiniaalluni angalaneq ingerlalluarluarluni iluatsippoq.

AQQUT sinnerlugu peqataasut- najukkani GUX-imi aqqutissiuussisunut ilinniartitsisinullu AQQUT-mi suliat pillugit oqaluttuarnissamut periarfissinneqarput. Tamatuma saniatigut, meeqqat atuarianni atuartunut, ilinniartitsinerni inuussutissarsiutinut sammititani ilinniartunut ilinniarnertuunngorniartunullu qarasaasiakkut aqqutissiuussinert AQQUT-mit neqeroorutit pillugit ilisimasaniq siammarterippat.

AQQUT-mi sulisut katersuuttarnerat

AQQUT ukiumut marloriarluni sulisunik tamanik katersuutsitsisarpog. Sulisut tamarmik aalajangersimasumik najoqqutassaqlutik ulluni pingasuni katersuuttarnissaat ilutsinni isumaqatigiissutaavoq.

Upernaakkut katersuunneq aprili qaammat Ilulissani ingerlanneqartoq, pingaarnertut aqqutissiuussinermut atatillugu iliuusissanut pilersaarummut tunngassuteqarpoq. Tamatuma saniatigut immikkoortut marluusut tamarmik immikkut ulloq ataaseq najoqqutassaqlarput.

Aappassaa katersuunnissaq ukiakkut pilersaarutaasoq- aqqutissiuussisulli 2023-imi ataatsimeersuarnissaat Nuummi septembarip ulluisa aqqaneq appaanniit 14-iannut ingerlanneqartoq pissutaalluni- katersuunnissaq 2024-imi januaarip qaammataata naggataanut kinguartinneqarpoq.

Aqqutissiuussinermut tunngatillugu iliuusissanut pilersaarut

Nuannaarutaqisumik aqqutissiuussinermi iliuusissanut pilersaarut Naalakkersuisut 2023-imi juuni naalersoq akuersissutigaa. Iliuusissanut pilersaarut ukioq ataaseq utaqqisaq- qulequtsiussat kisimik aalajangersimasuummata suliniutillu piffissap ingerlanerani allanngortartussaammata, pilersaarut allanngortartussaassaaq.

Aqutissiuussinnermi iliuusissanut pilersaarut uani atuarneqarsinnaavoq:

https://naalakkersuisut.gl/Publikationer?sc_lang=da tassunga pigaanni ulloq 30. juni 2023 nassaarineqassaaq.

Iliuusissanut pilersaarut anguniagassanik pingaarnernik pingasunik imaqarpog:

1. Ilinniartut ilinniartitaanermut ikaarsaarnissaannut tunngavissinniarlugit **meeqqat atuarfianni aqutissiuussinerup nukittorsarnissaa**
2. Innuttaasut ataasiakkaat **imminnut ilikkarlutik** taamaalillutillu ilinniakkamik suliffissamillu toqqaanissamut piginnaaneqalernissaat siunertaralugu **aqutissiuussinerup** nukittorsarnissaa.
3. Ilinniartut ataasiakkaat inuttut ineriartornikkut, isumaginninnikkut tarnillu pissusaagut siunnersorneqarnikkut **eqqarsartaatsikkut peqqissusaannik** ilikkartinnissaannut **siunnersuinerup** nukittorsarnissaa.

Anguniakkanut akisussaffinnulluunniit naqutissaaqarussi oqaaseqaatissaaqarussiluunniit, AQQUT-mut attaveqaqquneqarpusi.

Aqutissiuussisut ataatsimeersuarnerat

AQQUT Nuummi septembarip ulluisa aqqaneq aappaanniit 14-iannut- aqutissiuussisunik ataatsimeersuartitsivoq ima qulequtserlugu: "Aqutissiuussineq allatut nassuiarlugu- aqutissiuussineq ima suleqatigiissutigarpot".

Aqutissiuussisut sulilerlaat qangalilu sulisut, nassuiaammik nutaamik ataatsimoortumillu, aqutissiuussisunit tamanit malinneqarnissaa innersuussutaasumik tunniussinissaq, ataatsimeersuarnermi siunertaavoq. Nassuiaat nutaaq ataatsimeersuarnermi sunngornissamut aqutissiuussinnermi ilisimatuup Rie Thomsenip DPU-mi atorfininnerminut atatilugu oqalugiaataanit isumassarsiaq agguanneqarpog.

Tamatuma saniatigut iliuusissanut pilersaarummi pingaarnertut anguniagassat pingasut oqaluuserineqarpot tamatumalu kinguinngua suleqatigiissuteqarnerit/workshop pingasut ingerlanneqarlutik.

Ataatsimeersuarnermi peqataasut tamarmik tunniussaarpot AQQUT-llu iliuusissanut pilersaarummi suliniutinut-pitsaasunik amerlasuunik isummersorfigineqarluni, tamannalu pillugu tamassi qutsavigaassi.

Anguniagassatut pilersaarutini suliniuterpasuaqannginnera, suliniutaareersullu naammaqisut isummanillu pitsaasorpasuaarnik ilaneqarsinnaasut, AQQUT-mit paasineqarpog. Taamaalilluni immikkoortuni ataasiakkaani suut pingaartinneqarnerunerat iliuusissatullu pilersaarutip pingaarnersiukkanut naapertuunnera AQQUT-mit maluginiarneqarlualerpog.

2025-imi aqutissiuussisut ataatsimeersuaqqissapput.

Taamanikkornissaanut ataatsimeersuarnissaq Naalakkersuisoqarfimmit aningaasaliiffigineqanngippat aqutissiuussisut angalanermut aningaasartuutit akilertussassavaat.

Isummersuutit tamatigut atorneqarsinnaammata ataatsimeersuarnissamut pilersaarusiornermi peqataasinnaasut imal. isumassarsiatsiallitt, AQQUT-mut attaveqarnissaat neriuutigarpot.

AQQUMMUT QULLEQ

(Aqutissiuussinermut inerisaanermullu immikkoortortaasimasoq)

Anguniagaq: Aqutissiuussinermik nukittorsaaneq

AQQUMMUT QULLEQ sulisorisassatut aalajangikkat naapertorlugit: Inerisaanermi siunnersortit marluk, siunnersortaaneq ataaseq, allaffimmi aqutsisoq aqutsisorlu.

Sulisorisanut takussutissiaq				
<i>Aqutissiuussinermut inerisaanermullu immikkoortortaq</i>	<i>Aqutissiuussinermi inerisaanermilu aqutsisoq</i>	<i>Allaffimmi aqutsisoq</i>	<i>Siunnersortaaneq</i>	<i>Inerisaanermi siunnersortit</i>
Nuuk	1	1	1	2

AQQUMMUT QULLEQ sisamanik immikkoortortaqpooq

- Ilinniartitaanermut immikkoortortaq
- GUX-S
- Aqutissiuussinermut immikkoortortaq
- Sulisoqarnermut immikkoortortaq

Ilinniartitaanermut immikkoortortaq

Aqutissiuussinermut tunngatillugu inerisaanermi, aqutissiuussinermik sulialinnut tamanut paasissutissiinerit, aqutissiuussisutullu tunngaviumik ilinniartitaaneq, kiisalu tamatumunga nangitsivik neqeroorutaapput. Ilinniartitaanerit pikkorissaanerillu taakku; meeqqanik, inuusuttunik inersimasunillu; ilinniartitaaneq, suliffissaq sunngorsinnaanerlu pillugit aqutissiuussinermut tunngatillugu, ilinniagallit piginnaasaasa qaffasissusaannik qulakkeereqataapput.

Aqutissiuussisutut tunngaviumik ilinniartitaaneq 2023-ip aasaanerani- ilaatigut ilinniartitsisunik taarsiinikkut nutarterneqarpoq. Ilinniartitaanermi tamatumani ilinniartitsinermi atortussat, ilisimasat nutaanerpaat naapertorlugit nutartertuarneqarput taamaammallu ilinniartitsinermi atortussat, maanna siunissamilu suliniutaajuassallutik. Atortussanik aqutissiuussisunngorumaartussanut naapertuuttunik aqqissuussisoqartuassaaq. Siunissami ilaatigut aqutissiuussinermi puijuartitsinissaq pillugu piumasaqaammik eqquutitsisussamik ilinniartitsinermi atortussaqaassaaq¹, Nunanullu Avannarlernut inuiaqatigiinnullu naapertuuttunik atortussaqaassallunittaaq. 2023-imi aggustip ulluisa aallaqqaataanni ilinniartitsisumik nutaamik atorfinittisoqarpoq, taamaalilluni suliffitsinni marlunnik ilinniartitsisoqalerpugut.

¹ Aqutissiuussinermi puijuartitsineq tassaavoq aqutissiuussisup aqutissiuussaminut; ilinniartitaanikkut, suliffeqarnikkut, kariereqarnikkullu puijuartitseqaataasumik isumalimmik inuunissamut soqutiginninnera, taamaalilluni inuup inuiaqatigiillu akornanni naleqqussaana.


Sammasat naammassineqartut

Ilinniartitaanermut immikkoortortami 2023-imi aqqutissiuussisutut tunngaviusumik ilinniartitaaneq holdimi ataatsimi ingerlanneqarpoq, holdilu alla aallartinneqarluni. Pikkorissaaneq Meeqqanut inuusuttunullu aqqutissiuunneqarnissamut immikkut pisariaqartitsisunut tunngassuteqartoq upernaakkut ingerlanneqareerpoq.

2023-imi modulimut nangitsivimmu peqataaniarlutik nalunaartut ikippallaarnerat pissutigalugu, moduli 2024-imut kinguartinneqarpoq. Meeqqat inuusuttullu aqqutissiuunneqarnissamut immikkut pisariaqartitsisut pillugit, pilersaarutaasutut ukiaanerani pikkorissaanissaq taamaatiinnarneqarportaaq. Ilinniartitaanermut tunngatillugu sammasat ataani takuneqarsinnaapput:

- VGU 2022/23 (aqqutissiuussisutut tunngaviusumik ilinniartitaaneq).
- Meeqqat inuusuttullu aqqutissiuunneqarnissamut immikkut pisariaqartitsisut - upernaakkut.
- VGU 2023/24 (aqqutissiuussisutut tunngaviusumik ilinniartitaaneq).

2023-imi ilinniartussatut tiguneqarneq ilinniarnermillu naammassinnineq:




Pikkorissaanernut/ilinniartitaanernut assigiinngitsunut tiguneqartut amerlassusaat saamiup tungaani takutinneqarput.

Pikkorissaanerni/ilinniartitaanerni naammassisut amerlassusaat talerpiup tungaani takutinneqarput.

Moduli nangitsivik (tungujortoq taartoq) ilinniartitaanerup 2024-imut kinguartinneqarnera -, meeqqat inuusuttullu aqqutissiuunneqarnissamut immikkut pisariaqartitsisut ukiakkut (aappalungusersoq) taamaatinneqarnera aqqutissiuussisutullu tunngaviusumik ilinniartitaanerup (VGU) (qasertoq) 2024-imi juunimi aatsaat soraarummeernissaat pissutigalugit ilaangillat.

Pikkorissaanerni/ilinniartitaanerni qassit naammassisimanerat ataani takussutissiami takuneqarsinnaavoq.



E-læring

E-læring aqqutigalugu aqqutissiuussisunngorlaanut qarasaasiakkut paasissutissiissutini inerisaaneq aaqqiissutaasinnaanersoq, Aqqummut Qulleq-mit misissorneqarpoq.

E-læring aqqutissiuussinerup iluani sulilerlaanut tamanut atuartunillu imal. ilinniartunik aqqutissiuussillutik oqaloqatiginnittartunut tunngatinneqarpoq.

Paasissutissiissutit; aqqutissiuussisunngorlaanut meeqqat atuarfianneersunut, inuusuttunut ilinniartinneersunut, ilinniartitaanernullu inuussutissarsiutinut sammititaneersunut Majoriaqarfinneersunullu tunngatitaassapput.

E-læring tassaavoq qarasaasiakkut, qarasaasiaq toortagaq (tablet) imal. oqarasuaat angallattagaq (smartphone) atorlugu pikkorissartut ataasiakkaat piginnaasaannik inerisaanermi sakkussaq.

E-læring; aqqutissiuussisunngorlaap aqqutissiuussisutut sulilernissaanut, ilinniartitaaneq, suliffeqarneq sunngorsinnaanerlu pillugit meeqqanik inuusuttunik/inersimasunik aqqutissiuussinermut piukkunnarsarnissaanut-pilertornerusumik inerisaaqataassaaq.

E-læringip ilinniartitsisunut qarasaasiakkut pissarsiassaanissaa tunngaviumillu siunissami paasissutissiissutini piginnaasatigut inerisaanissamut sakkussanik ilanngussisinnaanissaq, Aqqutissiuussisutut tunngaviumik ilinniartitaanermi innersuussutaavoq.

GUX-S

GUX-S-imut qinnuteqarnissamut tunngatillugu apeqqutit akinissaannut immikkoortortaq ikiuuttarpoq. GUX-S qinnuteqartunut suussusersanik nappaatilinnut imaluunniit innarluutilinnut- ass. autisme aamma ADHD naatsorsuussaavoq. Nappaateqartut ilinniarnertuunngorniarnissamut piffissaliussap iluani naammassinissaannut tunngatillugu unammillerneqarajummata, immikkut tapersorsorneqarluni ilinniarnertuunngorniarnissamut qinnuteqartoqarsinnaavoq. Misiliut ukiumi atuarfiusumi 2017-imi aallartinneqarpoq 2023-imilu upernaakkut innersuussinermik aqqutissiuussinermillu misiliummik AQQUMMUT QULLEQ tiguvivoq.

GUX-S-imi ilinniarnertuunngorniat ilinniakkatigut ilinniarnertuunngornianut allanut piumasaqaatit assinginiq eqquutitsissapput. Piffissamili misiliviusumi tiguneqarnissaq inatsisitigut piumasaqaataasinnaanngimmat,

ilinniarnertuunngorniat, immikkut suliniuteqartuniit ilinniarnertuunngorniarniit, kommunit, angajoqqaat, qinnuteqartoq allallu naapertuuttut suleqatigalugit, ilinniarnertuunngorniap ilinniarnertuunngorniarnissamut tamatumaluunniit ilaanik ilinniarnissamut piareersimaneranik naliliisussanit innersuunneqarsinnaassagunik, faginut tunngatillugu piumasaqaataasut annikinnerpaat eqquutsissavaat (karakteritut piumasaqaatit, allatulli immikkut akuersisummik qinnuteqarsinnaaneq tiguneqarsinnaanissamullu misilitsinneq ilanngullugit).

Immikkut suliniuteqartut innersuussineranni ilinniarnertuunngorniamut suna naleqqunnerunersoq qulaajarneqassaaq, peqataasullu suleqatigalugit tamatuma neqeroorutaasinnaanissaa qulaajarneqassalluni. Innersuunneqareernerup kingorna tiguneqarsinnaanissaaq neqeroorutaasinnaassaaq. Taamaalluni ilinniarfik suna ilinnialernissamut neqeroorsinnaassanersoq innersuussinerup nalaani aatsaat paasineqassaaq, taamaammallu ilinniarnertuunngorniaq tiguneqarnissamik imal. ilinniarfimmi aalajangersimasumi ilinnialernissamik piumasaqaateqarsinnaanani. Ilinniarnertuunngornialli immaqalu angajoqqaavisa/angajoqqaatut akisussaasut, nunap immikkoortuani sumiinnissamik kissaataat sapinngisamik eqquutsinniarneqassaaq. Ilinniarnertuunngorniani taakkunani timikkut isumaginninnikkullu immikkorluinnaq ittunik pisariaqartitsisoqarsinnaammat, ilinniarnertuunngorniarnifimmit kollegiami inissamik naapertuuttumik tunniussisinnaanissaaq qulakkeerneqarsinnaanngilaq. Pisariaqartinneqassappat inissamik kiisalu isumaginninnikkut tapersersuisussanik kommuni amerlanertigut ikiuuttussaassaaq.

Immikkut suliniuteqartut suliaat oqaatigineqareersutut 2023-imi marsi qaammat AQQUT-mit tiguneqarput, 2023-imilu aggusti qaammat siunnersortimik aqqutissiuussisut tunngaviummik ilinniartitaanermi ilinniartitsisuumittaaq atorfinittisoqarpoq.

Immikkut suliniuteqartut tassaapput AQQUT-mi pisortaq Christine Tønnesen, tarnip pissusaanik immikkut ilisimasalittut pisortatut atorfeqarallartoq Karina Schjøtt siunnersortaanerlu Paornáguak' Lyng Hansen. Immikkut suliniuteqartut piginnaaneqarfisaat tassaapput tarnip pissusaa pillugu ilisimasat, PPR, immikkut ilinniartitsineq kiisalu suliaassarfimmi ataqtigiissarineq.

2024-imi septembarip ulluisa aallaqqaataat qinnuteqarfissaaq kingulleq nalleriartortoq qinnuteqartoqanngimmat, GUX-S-imut qinnuteqarfissaaq kingulleq ukioq manna oktobarip ulluisa aallaqqaataanut kinguartinneqarpoq. GUX-it Majoriallu tamarmik qinnuteqarfissatut killiliussamik kinguartitsineq pillugu 2023-imi aggustip ulluisa qulinganni nalunaarfigineqarput. GUX-ini ataasiakkaani rektorit qinnuteqaatinik tigusaqarsimannginnertik pillugu oktobarip ingerlanerani nalunaarput.

Immikkut suliniuteqartunut saffiginninnerit:

Saaffiginneriaaseq	Saaffiginnittut amerlassusaat
Allakkatigut saaffiginninnerit	4
Oqarasuaatikkut saaffiginninnerit	1 (eVeJledning aqqutigalugu)
Nammineq saaffiginninnerit	0

Saaffiginninnerit suminnganneernerat	Patsisaasoq
Campus Kujalleq	Ilinniartut pingasut nappaataat suussusersisat marlullu ADHD-mik nappaateqarsorisat: ilinniartuutit ikiorniarlugit Ilinniarfiup qanoq iliuuseqarsinnaanera
Ilinnialerniat	Paranoid skizofreni-mik nappaateqarluni ilinnialerniarluni qinnuteqartoqarsinnaanersoq Tarnikkut nappaateqaraanni GUX-S-imut qanoq qinnuteqartoqarsinnaanera
Angajoqqaat	Panissaq ukkassilluarsinnaanngitsoq nappaateqassappalli suussusersineqanngitsoq- GUX-S-imut qinnuteqarsinnaanersoq Erneq ADHD-mik nappaateqartoq GUX-S-imut qinnuteqartoq akissutisisimannngitsorli. GUX-imut nalinginnaasumut qinnuteqarsimanera kingorna paasineqartoq.

Nappaatit suussusaat	Allat
Qinnuteqartoqarsimanngimmat misissuisoqarsimananilu innersuussisoqarsimanngilaq. Ilinniartunut makkunannga nappatilinnut tunngatillugu ikorfartorneqarnissaq kissaataasimavoq: • Aspergers syndrom • ADHR • Borderline	Naqinnernik takunnissinnaanngitsunut tunngatillugu naqinnernik takunnissinnaanngitsut pillugit suleqatigiinni aqutsisoq Ilinniartitaanermut Aqutsisoqarfimmeersoq ukiarmi ataatsimeeqatigineqarsimavoq, naqinnernillu takunnissinnaannginneq pillugu paasissutissanik 2018-imi ukiumoortumik nalunaarusiameersunik katersisoqarsimalluni taakkulu naqinnernik takunnissinnaanngitsut pillugit suleqatigiinni aqutsisumut januaari qaammat 2024 tunniunneqarsimallutik.

Aqutissiuussinermut immikkoortortaq

Aqutissiuussinermut tunngasunik misissueqqissaarfik inerisaavillu. Najukkani/qitiusumik immikkoortuni aqutissiuussisut attaveqatigiit ataatsimiittarnerinik pilersitseqataallutillu attasseqataallutillu ingerlatseqataasarputtaaq. Aqutissiuussisut sakkusaannik inerisaasoqartuarpoq sakkussallu taakku AQQUT-ip nittartagaani tamanit pissarsiarineqarsinnaapput. Nittartagaq aqutissiuussisunit- ilaatigut aqutissiuussinermi periutsinik assigiinngitsunik-

isumassarsiorfiusinnaavoq. Aqqutissiuussisut apeqqutissaqalerunik, aqqutissiuussinermullu tunngatillugu siunersioqateqarnissaq pisariaqartikkunikku eVejledningitsinnut attaveqarsinnaapputtaaq.

eVejledning

eVejledning tassaavoq ilinniartitaanermut tunngatillugu aqqutissiuunneqarnissamik pisariaqartitsisunut tamanut internet atorlugu neqeroorut. eVejledningimi aqqutissiuunneqarniaq ilinniakkamik toqqaanissamut tunngasumik apeqqutissaqarpat aqqutissiuussisarpugut. Aqqutissiuussat aalajangersimasunik apeqquteqarsinnaapput, imal. ilinniakkamik toqqaanissami aqqutissiuussap periarfissai pillugit atitunerusumik internetsikkut toqqaannartumik allaqatigiissinnaavugut (chat). Aqqutissiuussaq nammineq iliuuseqarsinnaaqqullugu toqqaasinnaaqqullugulu, ilinniarnermi aqqutissamik aqqqisuussinissaanut toqqakkamillu imal. unammilligassamik isumaliutiginninnissaanut aqqutissiuussisarpugut ikorfartuisarlutalu.

AQQUT-ip nittartagaa nutarterneqartuarmat AQQUT-ip Facebookimi quppernera malinnaaffigiuk, tassaniipput aamma ilinniartitaanermut tunngatillugu isumassarsititsisinnaasut. Tassani ilinniartut assigiinngitsut ilaatigut atuartuunertik /ilinniartuunertik oqaluttuaat.

eVejledningimi saaffigineqartut tassaapput nunatsinni innuttaasut tamarmik. Aqqutissiuunneqarnianut, atuartunut/ilinniartunut, aqqutissiuussisunut imal. angajoqqaanut/aanakkunnut ilinniartitaaneq pillugu apeqqutissalinnut aqqutissiuussisinnaavugut.

eVejledning kisitsisinngorlugu

eVejledningimut saaffiginnittut 2020-imiit 2023-imut amerlassutsimikkut aalajaapput. Februaarimi marsimilu amerlanerpaanerat immikkut maluginiagassaavoq 2023-imilu novembarimi amerleriarnarat, ilinniartitaaneq pillugu paasititsiniaalluni angalanerup naammassinerata kingunerisinnaallugu.

eVejledningip ammasarfiata qinnuteqarfissap kingulliup februarip ulluisa aallaqqaataata- februaarip ulluisa 28-iat ilanngullugu sivitsorneqartarnera ileqqunngornikuuvoq.

Inuttut aqqutissiuunneqarnissaq eVejledningimit neqeroorutaavoq, aqqutissiuussallu kinaassutsimi isertuunnissaa toqqarsinnaavaa. Aqqutissiuussisugut aqqutissiuussisutut ilinniarsimasuupput aqqutissiuunneqarniamillu aqqutissiuussinissamut piareersimallutik. Ilinniartitsisut aqqutissiuussisullu eVejledningimik atuinissamut tikilluaqqusaapputtaaq. eVejledning mailikkut, chat-ikkut, mobil-ikkut imal. Messengerikkut attavigineqarsinnaavoq. 2020-imiit 1094-it eVejledningimut saaffiginnissimanerat naatsorsueqqissaarnermi kisitsisit takutippaat, ataani skema takuuk.

År	Telefonopkald	Chats	Emails	Fb - Messenger	Andet - NTI-Nuuk	I alt
2020	62	36	119	42	13	272
2021	105	64	71	22	1	263
2022	107	34	62	65	1	269
2023	56	71	115	26	22	290
I alt	330	205	367	155	37	1094

Chatikkut mailikkullu saaffiginnissutit- pingaartumik ukioq manna amerleriarput tunngaviusumillu tamanna AQQUT-mi saaffigisat AQQUT-mi eVejledningimut neqeroorummit anguneqalernerannik isumaqarsinnaavoq.

Nittartagaq

Nittartakkap nutarterneqarnera 2023-imi AQQUT-mit naammassineqarpoq. AQQUT-ip nittartagaq kalaallisut danskisullu oqaasertaqarpoq.

Aqputissiuunneqarnianik/ilinniartunik aqputissiuunneqarnissamik ikorfartorneqarnissamillu pisariaqartitsisunik aqputissiuussisunillu tapersersuinissaq AQQUT-mi anguniagassatut siunniussaavoq. Immikkoortortanit tamanit neqeroorutit AQQUT-ip nittartagaani atuarneqarsinnaapput:

- Qinnigorneq itinerusumik paasisaqarfiginiaraanni
- eVejledning itinerusumik paasisaqarfiginiaraanni
- Aqputissiuussineq pillugu paasisutissanik aallerfissaq itinerusumik paasisaqarfiginiaraanni
- Pikkorissaanerit ilinniartitaanerillu itinerusumik paasisaqarfiginiaraanni

AQQUT pillugu paasisutissanik misissuinissamut tikilluaqqatsigit. Nittartagarput aqqissuussinernut nutaarsiassanullu saqqummiussivipputtaq uani nassaariuk: www.aqqut.gl.

Filmit

eVejledning-imut tunngasunik naatsunik marlunnik filmiortoqarpoq. Siulleg eVejledningimut- aappaalu ilinnialernissamut piareersarnermut tunngasoq. Videot taakku AQQUT-ip nittartagaani eVejledning-ip nalaani nassaassaapput².

Tusarnaagassiat/Podcast

2023-imi nutaatut tusarnaagassianit quliusunit tallimat naammassineqarput. 2023-imi qulinik tusarnaagassiornissaq siunertaavoq, assigiinngitsunilli- ilaatigut AQQUT-mi ulapputeqarneq avataaniillu suleqatigisap immiussisarfimmut tunngatillugu unammilligassaqarsimanera pissutaallutik tusarnaagassiat tallimat immiunnissaat iluatsinneqarpoq. Tusarnaagassiat taakku tallimat 2023-imi immiunneqartut tassaapput:

- Aqqut Podcast *immikkoortoq 1*: Ilinniarfeqarfinnut qinnuteqarfissat killigititaat, qinnuteqarniarnermullu paasisutissat assigiinngitsut.
- Aqqut Podcast *immikkoortoq 2*: Danmarkimi ilinniartuuneq.
- Aqqut Podcast *immikkoortoq 3*: Ilinniarnerup aallartinnissanut eqqaamasassat (tjekliste), taavalu ilinniartigerusutamat qinnuteqarnikuulluni tigusaasimanngikkaani qanoq iliortoqarsinnaanersoq.
- Aqqut Podcast *immikkoortoq 4*: Majoriaq, Majoriami ilinniartuuneq

² <https://aqqut.gl/da-evejledning/>

- Aqqut Podcast *immikkoortoq 5*: Kangerlussuarimi Issittumi Sakkutooqarfinmi ilinniartitaaneq nutaaq:
Issittumi tunngaviusumik ilinniartitaaneq.

Kingusinnerusukkut tusarnaagassanik immiuksinnerit nanginneqarnissaat neriutigaarput.
Spotify-imi imal. Apple Podcast-imi ujaasinikkut: Aqqut Podcast tusarnaagassiamik tusarnaarsinnaavutit.
Tusarnaarlurna.

Attaveqatigiinni ataatsimiinnerit

Aqqutissiuussinnermut immikkoortortap suliassaasa pingaarnerit ilagaat najukkani aqqutissiuussivinni, ilinniartinni, suliniaqatigiiffinni peqatigiiffinnilu attaveqatigiinnut tunngatillugu ikorfartuinissaq. Periarfissaqarfitsigut aqqutissiuussisunik naapitsinikkut qarasaasiakkullu ataatsimiinnertigut attaveqatigiinnerup annertusarneragut taamaliortarpugut. Ataatsimiinnerit aqqutissiuussisut sunik atorfissaqartitsilersinnaanerisa ilisimalernissaanut pingaaruteqarput, aqqutissiuussisullu sulineranni sapinngisamik pitsaanerpaamik qanoq tapersersuisinnaanitsinnik annertuumik paasisaqartitsillutik. Aqqutissiuussisut amerlasuut atuarfinni taamaaqataannilu allani kisimiittarput imal. eqimattani ikittuinnaasarlutik, taamaammallu aqqutissiuussinnermi sulianut tunngatillugu aqqutissiuussisoqatigiinni siunersioqatigiittarsinnaaneq ilisimasanillu avitseqateqartarsinnaaneq atorfissaqartissinnaasarlugu. Najukkani attaveqatigiittut ataatsimiittoqartarnersoq januaari qaammat AQQUMMUT QULLEQ-mit misissorneqarpoq. Illoqarfinni amerlasuuni attaveqatigiittut ataatsimiittoqartannginnera, misissuinerup takutippaa. Najukkani attaveqatigiittut ataatsimiittarnernik misissuineq ima inerreqarpoq:

Illoqarfik	Attaveqatigiinni ataatsimiittoqarpa	Illoqarfik	Attaveqatigiinni ataatsimiittoqarpa
Qaanaaq	Naamik	Sisimiut	Naamik
Upernavik	Naamik	Maniitsoq	Naamik
Uummannaq	Aap	Nuuk	Aap
Ilulissat	Naamik	Paamiut	Naamik
Qasigiannugit	Aap	Qaqortoq	Aap
Qeqertarsuaq	Ilisimaneqanngilaq	Narsaq	Naamik
Aasiaat	Aap	Nanortalik	Ilisimaneqanngilaq
Kangaatsiaq	Aap	Tasiilaq	Naamik
Kangerlussuaq	Ilisimaneqanngilaq	Ittoqqoortoormiit	Ilisimaneqanngilaq

Attaveqatigiinni ataatsimiittarnernik aallartitserusuttunut ikiuunnissamik neqeroornissaq AQQUMMUT QULLEQ-mi pingaartinneqarmat, piffissaqarnermi/kajuminnermi attaveqatigiittut ataatsimiittarneq aqutissiuussisunut ilinniartitsisunullu- akuttunngitsunik atuartunut/ilinniartunut attaveqartartunut sammititaq- pilersinneqarpoq. 2023-imi ukioq naallugu piffissaqarnermi/kajuminnermi qarasaasiakkut attaveqatigiittut ataatsimiinnernut tamatigut tamaana takkutoqartarpoq. Ilaatigut peqataasut amerlanerusarlutik ilaatigullu ikinnerusarlutik. Piffissaqarnermi/kajuminnermi attaveqatigiittut ataatsimiinnermi sammisat peqataasullu, ilanngussaq 1-imi takukkit³. Periarfissap tamatuma ilisimaneqarnerulersinnissaa AQQUT-mi siunertaavoq 2024-imilu suliniutigina nangingeqassalluni⁴.

Sulinermut atatillugu angalanerit

QINNGORNEQ (Ilinniartunut Siunnersuisarfiusimasoo) peqatigalugu AQQUMMUT QULLEQ sulinermut atatillugu angalavoq.

Sulinermut atatillugu angalanerit AQQUT-mi neqeroorutaasunik Majorianut ilinniartinnullu siammarterinissaq siunertaavoq. Periarfissaatillugu illoqarfinni ataasiakkaani aqutissiuussisoqatigiit katersorneqartarput. Najukkani iliuuseqartussanik oqaloqateqarnissaq sulinitinnut piumasaqaataavoq pingaarutilik, nunalu tamakkerlugu aqutissiuussisarnerup annertunerusumik ataqatigiissaarneqarnissaa najukkanilu kulturikkut assigiinngissutsinut akisussaaffiup tigummiinnarnissaa AQQUT-miit anguniagaalluni.

Aqqummut Qulleq, sulinermut atatillugu Qinngorneq peqatigalugu illoqarfinnut ukununga angalavoq: Sisimiut, Aasiaat, Ilulissat, Tasiilaq Qeqertarsuarlu. Qarasaasiakkut Qasigiannguani, Nanortalimmi, Kangaatsiami, Uummammi, Maniitsumi Upernavimmi. Sila pissutaalluni angalanissat taamaatiinnakkat: Qasigiannguanut februaari qaammat, Uummammut Ilulissanullu aggusti qaammat Qaqortumullu novembari qaammat.

Tamatuma saniatigut immikkoortortaq sulinermut atatillugu Danmarkimut, Norgimut, Sverigimut Savallimmiunullu angalavoq.

Nunani Avannarlerni killeqarfiit pisortaqaarfiillu akimorlugit inersimasunik ilinniartitsinermit suleqateqarneq (NVL Grønland)

Aqqummut Qulleq-mi AQQUT-mi suliat qiterisaannik ikorfartuissagaanni - siullermik Nunani Avannarlerni susoqarneranik paasiniaannissaq- tulliatillu nunanik namminersortunik suleqateqarnissamut periarfissinneqarsinnaanissamut, Nunani Avannarlerni attaveqatigiinnut akuunissaq naapertuupput. Naggataagut minnerunngitsumilli tamatumunga atatillugu ilisimasaqalernissaq nunatsinni aqutissiuussinerup inersarnissaanut suliat nangingissaanut naapertuuppoq.

³ Piffissaqarnermi/kajuminnermi attaveqatigiinni ataatsimiinnerni sammisat peqataasullu pillugit ilanngussaq 1 takuuk

⁴ AQQUT-mit kommunimut attaveqaatit

Inuuneq naallugu ilinniarneq siunissamilu naapilluni inuiaqatigiinni inuunermut allanngoriartortumut peqataanissamut piginnaanerit; meeqqanik, inuusuttunik inersimasunillu piareersaasussat pillugit, qarasaasiakkut naapillunilu oqaloqatigiinnerni peqataaneq, NVL Grønlandimut ukioq manna sammisani pingaarnepaajusimavoq. 2023-imi septembarip ulluisa aqqaneq aappaanniit 14-iannut Nuummi nuna tamakkerlugu aqqutissiuussisunut ataatsimeersuartitsisoqarmat, NVL- aqqutissiuusseqatigiinneersut marluk; inuunermi ikaarsaarfinni aqqutissiuussineq piujuaannartitsinerlu pillugit nutaanerpaanik isummersuuteqaqqullugit qaaqquneqarput.

Tamatumani inuiaqatigiit qanoq allanngoriartortarnerisa aqqutissiuussisunit eqqumaffigineqarnissaanik qulakkeerinnissap pingaarteqarnera, kiisalu maanna siunissamilu piginnaasat allat suliffeqarfinniit ujartorneqalersinnaanerit erseqqissarneqarpoq. Tamanna ilinnialerniat ilinniakkamik toqqaanissaannut sunniuteqarsinnaammat, aqqutissiuussisunit eqqaamaneqassaaq.

Nordplus inersimasunut

Aqqutissiuussinermut tunngatillugu iliuusissanut pilersaaruteqarpoq, nunatsinnili ornigulluni aqqutissiuussineq periusaangilaq. Illoqarfinni annerusuni minnerusunilu ornigulluni aqqutissiuussineq annertuumik assigiinngissuteqartutut misigineqarpoq. Nunatsinni ornigulluni aqqutissiuussinermut tunngasumik suliassaqarfinnut nassuiaateqanngilaq, taamaattorli allanngortinneqassappat Naalakkersuisut marluk aqqusaarneqaqqaartariaqassapput. Ornigulluni aqqutissiuussinermut atatillugu, Aqqummut Qulleq piareersaatitut Savalimmiunut tikeraarnissamut aningaasanik qinnuteqarpoq.

Tamatumani oqaluuserineqartussaq tassaavoq: Ilisimasanik misilittakkanillu avitseqatigiinneq. November 2023. Piareersaatitut Savalimmiuni tikeraarnermi Vegleiðingarstovan peqatigalugu suleqatigiinnermi Savalimmiuni nunatsinnili ornigulluni aqqutissiuussineq pillugu pilertornerusumik inerisaasoqarsinnaanissaa AQQUT-mit neriutigineqarsimavoq.

Vegleiðingarstovan, AQQUT-mit tikeraarneqartoq immikkoortunut suleqatigiinnut ilaavoq. AQQUT aamma Vegleiðingarstovan assigeeqaat, aqqissuussaanaikkulli assigiinneqalutik. Vegleiðingarstovan-imi tutsuiginarsaaneq, aqqutissiuussineq ilinniartitaanermullu Aqutsisoqarfik suleqatigiipput aqqissuussaanerallu oqartussanut toqqaannartumik attaveqarnermut assingulluni. Nunatsinnili ilinniartitaanermut, Kultureqarnermut, Timersornermut, Ilageeqarnermullu Naalakkersuisoqarfimmut (AQQUT) Suliffeqarnermullu Naalakkersuisoqarfimmut (Majoriaq) imal. oqartussanut toqqaannartumik attaveqanngilaq.

Piareersaatitut tikeraarnermi ornigulluni aqqutissiuussinermut tunngatillugu, nunat akornanni suleqatigiinnissamut annertunerusumik tunngavissaqannginnera inernilunneqarpoq. Ornigulluni aqqutissiuussinermik suliaqarnermi killiffiit imminnut ungasinnerat assersuunneqarsinnaannginnerallu tamatumani patsisaapput. Tamatumunnga taarsiullugu soqutiginarsinnaasoq tassaassaaq Savalimmiuni ilinnialersinnaanermut tutsuiginarsarnermik suliaqarnermut tunngassuteqarnerusumik misissuinissaq. AQQUT-mit Savalimmiunit ilinniarfiusoq tassaavoq aqqissuussaanaikkut oqartussanut toqqaannartumik attaveqarnerup atorsinnaanera. Ornigulluni aqqutissiuussinermut atatillugu ajornartorsiut aqqiiviginiarlugu; tutsuiginarsaaneq ilinniartitaanermut Aqutsisoqarfiup nunatsinnili aqqutissiuussinernup toqqaannartumik attaveqarnissaat suleqatigiinnissaallu AQQUT-mit suliniutigineqassaaq.

2024-imi ukkanneqartussat

Siullertut pingaarnertullu AQQUMMUT QULLEQ-mi iliuusissanut pilersaarummi anguniagassatut siunniussat, suleqatigisanik oqaloqatigiissitsineq najukkanilu iliuuseqartussanut pulaarneq nanginneqassapput. AQQUT-ip aqputissiuussinermi pingaarnertut akisussaaffia, nunatsinni illoqarfinni annerusunil iliuuseqartussanik qanimut oqaloqateqarnermik suleqatigiinnermillu- illoqarfinnut minnerusunut tikeraarnernik ilalimmik- annertuumik tunngaveqarpoq.

Tamatuma peqatigisaanik ikorfartoqatigiinnikkut/supervision siunersioqatigiinnikkullu attaveqatigiit ataatsimiinnerinik malitseqartitsisoqartassaartaaq.

Aqputissiuussinermik siornatigut pisartut paarlattuanik pingaarnersiuinissamik qulakkeerinnissaq AQQUMMUT QULLEQ-mit kissaataavoq. Tamanna aamma aqputissiuussinermut tunngatillugu iliuusissanut pilersaarummi, imm. siullermi: Atuartut ilinniartitaanermut ikaarsaarnissamut tunngavissinniarlugit **meeqqat atuarfianni aqputissiuussinermik nukittorsaanissaq**- anguniagassatut siunniussaavoq.

Aaqqissuussamik suliniuteqarneq periutsinik sukumiisunik tunngaveqartoq, ilinniartitaanermi aaqqisuusnaanikkut qaffasissutsini tamani aqputissiuussinermik inerisaaqataassaaq. Kingusinnerusukkut pinnani meeqqalli ineriartornerisa aallaqqaataani aqputissiuussinerup annertunerunissaa, tamatumani isumaavoq. Suliaq annertuvoq susassaqaqatigiillu arlallit anguniagaq anguniarlugu suleqatigiissapput.

Aqputissiuussinermi atuartut ataasiakkaat inuttut imminnut ilikkarnissaat, inuunerminnilu tullianik alloriarnissaaq aalajangiivigittinnagu nammineq piginnaasaminnik, kissaatiminnik piginnaanerminnillu isumaliutiginninnissaat, anguniagaavoq.

Aqputissiuussisutut tunngaviusumik ilinniartitaanermi modulinilu nangitsivinni ilinniartunik amerlanerusunik tigusinissaaq, pikkorissaanernillu saaffigisanut aqputissiuussinermut tunngatillugu assigiinngitsunik sulialinnut siunnerfiliinissaaq, Aqqummut Qulleq-mit piareersimaffiussaaq. Aqputissiuussisut piginnaasatigut inerisaaviginnissaannut qanimut suleqateqarnissaaq piumasaqaatinillu unammilligassanillu nuna tamakkerlugu aqputissiuussisunit naapinneqartartunik ilisimaarinnilluarnissaaq piumasaqaataapput.

QINNGORNEQ

(Ilinniartunut Siunnersuisarfiusimasooq)

Anguniagaq: Siunnersuinerup nukittorsarneqarnissaa

2023-imi nutaamik taaguutitaarpoq. Taaguutissaanik unammisitsinermi tamanit siunnersuuteqarfigineqarsinnaasumi Qinngorneq toqqarneqarpoq. Isumaa tassalu inuit piginnaasaasa sunniutaannut ersiutitaanera tunngavigalugu taaguut taanna toqqarneqarpoq.

Sulisut

Qinngornermi sulisorisassatut aalajangersakkat tassaapput tarnip pissusaanik immikkut ilisimasallit/tarnikkut

katsorsaasut aqqaneq marluk tarnillu pissusaanik immikkut ilisimasalittut pisortaq ataaseq. 2024-imi januaarip ulluisa aallaqqaataanni Qinnqornermi sulisoqarnikkut ima inissisimasoqarpoq:

Sulisorisanut takussutissiaq				
Ilinniartunut Siunnersuisarfik	Tarnip pissusaanik imm. ilisimasalittut pisortaq	Tarnip pissusaanik imm. ilisimasallit	Tarnikkut katsorsaasut	Atorfiit inuttaqanngitsut
Nuuk	-	3	1	-
Sisimiut	-	1	-	1
Ilulissat	-	1	1	-
Qaqortoq	-	2	-	-
Aasiaat	-	1 ernisumut taartaasoq	1 (ataaserlu ernereernermi sulinngiffeqartoq)	-
Katillugit	-	8	3	1

Katillugit katsorsaasut aqqaniliupput, Sisimiunili atorfimmut ukiut nikinngitsiarneranni qinnuteqartunik oqaloqateqartoqarmat, februaarip ulluisa 15-ianni atorfinittoqassaaq. Taamatuttaaq Nuummi tarnip pissusaanik immikkut ilisimasalittut atorfimmi maanna atorfeqartoq februaarip naanerani suliunnaassamat, atorfik taanna maanna inuttassarsiuunneqarpoq.

Immikkoortortaq arlaleriarlugu tarnip pissusaanik immikkut ilisimasalittut pisortassarsiuunneqaraluarpoq, ikippallaalli qinnuteqarsimallutik. Nutaanik allagarsiinikkut atorfimmut inuttassarsiuussineq nangissavarput. Atorfeqareersoq tarnip pissusaanik immikkut ilisimasalittut pisortatut atorfinikkallartinneqarpoq.

Saaffigisat

Meeqqat atuarfianni atuartut efterskolertullu pinnagit, Qinnqornermit saaffigineqartut tassaapput nunatsinni ilinniartut tamarmik. Ilinniartut Qinnqornermit saaffigineqartut- Majoriamiittut ilanngullugit- 3700 missigigaat, 2018-imi naatsorsuinerup takutippaa (stat.gl). Nunatsinnilu ilinniartut tamarmik neqeroorutitsinnik atuisinnaanissaannut periarfissanik qulakkeerinissaq, Qinnqornermit suliniutigineqartuarpoq.

Taamaammat Qinnqorneq Majoriaqarfiit- inimik qarasaasiakkut tarnikkut katsorsaaneramik isumaginniffiusussamik pilersitsisunik suleqateqarpoq. Tamanna illoqarfiit Majoriaqarfiit amerlanersaanni iluatsippoq, sulili sumiiffiit ilaanni iluatsinngilarput. Taakkuuppullu Qaanaaq Ittoqqortoormiillu. Ukioq manna ininik Teams-ikkut attaveqatigiiffissanik nutaanik marlunnik Tasiilami Paamiunilu Majoriami pilersitsisoqarpoq

Katsorsaanermut atatillugu paasissutissat

Katsorsaanermut atatillugu paasissutissat allattugaatinut qarasaasiakkut nalunaarsuiffimmiit Danjournalimiit Qinnigornermit atorneqartumiit pissarsiarineqartarput. Danjournal naatsorsueqqissaarnermi sakkusnaanani-pingaarnertut allattugaatinut toqqorteriviummat, kisitsisit tunuarsimaarfigineqassapput. Tamatuma saniatigut allattugaatinik toqqorterivimmik atuineq nutaajungaatsiarpoq taamaammallu atorneqanun tunngatillugu naatsorsueqqissaarnermut sunniuteqarsinnaasumik sulit naleqqussaasoqartuarluni.

Pingaarnertut suliniutaasoq

Qinnigornermi pingaarnertut suliniutaasoq tassaavoq ilinniartunik ataasiakkaanik tarnikkut immikkut katsorsaaq. Tarnikkut katsorsaaq najuulluni imal. qarasaasiakkut neqeroorutaavoq. Ilinniartut nittartagarput aqqutigalugu nammineq qinnuteqartarput, tamatuma kingorna innersuunneqartarput utaqqisullu nalunaarsorsimaffiannut ilanngunneqartarlutik. Tarnikkut katsorsaaq qinnuteqartup katsorsaaq akornanni aallarniutitut oqaloqatigiinneq tunngavigalugu aallartinneqartarpoq, tamatumalu kingorna, qulit pallillugit oqaloqatigiinnertigut, tarnikkut katsorsartinneq neqeroorutaasarluni.

Qinnuteqaatit

2023-imi Qinnigornermut qinnuteqartut 699-iupput taakkunanngalu 639-it aallartillutik. Ukiunut siuliinut sanilliullugu Qinnigorner 2022-imi qinnuteqaatinik 699-inik tigusaqarpoq, 2021-imi 602-ullutik 2020-imi 654-iullutik. 2023-imi neqeroorutitta nunatsinni kikkunnit tamanit ilisimaneqalernissaa anguniarlugu, inuit attaveqatigiittarfiini iliuusissatut siunniussarput nangipparput. 2024-imi inuit attaveqatigiittarfiini saqqumineruniarsarinerput nangissavarput ilinniartinnilu neqerooruterput pillugu saqqummiussisassalluta. Qinnuteqartut amerlassutsimikkut allanngorarnert-ilaatigut avataaneersunik Qinnigornermit sunniuteqarfigineqanngitsunit- soorlu ukioq taanna ilinniartut amerlassusaat, ilinniartut nalerisimaanngitsut amerlassusaat il.il. patsiseqarnera ilimagisariaqarportaaq. 2022-imi 2023-imi qinnuteqartut qaammammut agguataarlugit amerlassusaat takussutissiami 1-imi takutinneqarpoq. Oqaloqatissat nutaat tassalu qinnuteqartut katsorsartinnissamut innersuussat amerlassusaat takussutissiami 1-imi takutinneqarportaaq. 2021-ip 2020-illu ingerlanerini qinnuteqartut agguataarneqarnerat takussutissiami 2-mi 3-imi takutinneqarpoq.

Takussutissiat naapertorlugit qinnuteqartut aggustimiit novembari ilanngullugu amerlanerpaajupput, taamatullu qinnuteqartut ilaat amerlaqisut februaarimi marsimilu qinnuteqartarlutik. 2023-imi Qinnigorner januaarimi qinnuteqartut amerlassusaannut tunngatillugu rekortiliivoq. Qinnuteqartut amerlassutsimikkut nikerarnerisa ilinniartut ukioq kaajallallugu pisartunut – tassalu qinnuteqartut aasaanerani feeriarfiup nalaani ikinnerusarnerannut atassuteqartoq naatsorsuutigineqarpoq, qinnuteqartut amerlanerunerannut, ilinniartinnilu januaarip naggataani/februaarip aallaqqaataani, kiisalu aggustip naggataani/septembarip aallaqqaataani saqqummiussisarnitsinnut atassuteqarnera takuneqarsinnaavoq. Ilinniartut qaammataini taakkunan ilinniakkamik nutaamik aallartitsisarmata, imal. feeriareerlutik linniakkaminut utertarmata, piffissani taakkunan

saqqummiussisarpugut. Taamaaliornikkut neqeroorutitta ilinniartunit nutaanit tamanit, sapinngisamik piaarnerpamik, ilisimaneqalernissaa qulakkeerniartarparput. Tamannali pingaartumik decembarimi januaarillu aallaqqaataani, katsorsaausutta tamarmik oqaloqatissatut nalunaarsukkatik tamaasa septembarip, oktobarip novembarillu ingerlanerini ulikkaareertarmatigik, utaqqineq sivitsortarpoq. Tamatuma saniatigut katsorsaausut juullikkunni sulinngiffeqartarmata, piffissami tamatumani oqaloqatigisassanik tigooraaneq annikillisarpoq. Taamaalluta ukiup annertunersaani utaqqineq sap. ak. marluk sisamallu akornanni sivisussuseqartarpoq decembarimili januaarillu aallartisimalernerani utaqqineq sap. ak. arfinilinnut sivitsortarluni.

Oqaloqatigiinnerit amerlassusaat

Aallarniutitut tarnikkut katsorsartinnermut atatillugu oqaloqatigiinnerit, kiisalu oqaloqatigiinnerit oqarasuaatikkut-, qarasaasiakkut naapillunilu oqaloqatigiinnerit agguataarneqarnerat tabelimi 2-mi takutinneqarpoq. Naggataagut 2023-imi nalunaaqqaarlutik nalunaaqqaaratillu takkutinngitsut tabelimi takutinneqarput. Nalunaaqqaaratik takkutinngitsutut nalunaarneqartutut tassaapput piffissani oqaloqatigiiffissatut pilersaarutaasuni, kingusinnerpaamik oqaloqatigiinnissaq aqaguppat, imal. napparsimanermi ulloq taanna qulaaluangortinnagu nalunaaqqaaratik takkutinngitsut. Paasisutissat Danjournalimit pissarsiaapput.

Tabeli 2 – Oqaloqatigiinnernut takussutissiaq	
Aallarniutitut oqaloqatigiinneq	460
Tarnikkut katsorsaausumik oqaloqateqarnerit	2077
Oqaloqatigiinnerit katillugit	2587
Taakkunannga:	
Oqarasuaatikkut	68
Qarasaasiakkut	1122
Naapilluni oqaloqatigiinnerit	1347
Aggersinnaanatik nalunaartut	444
Takkutinngitsoortut	506

Suiaassuseq

Qinngornerup atuunnerani, arnat angutillu katsorsartittut agguataarsimanerisa annertuumik assigiinngissuteqarnera takussutissiami 4-imi - 2023-imi ataasiakkaarlutik oqaloqatigineqartut suiaassutsikkut agguataarsimanerannik takutitsisumi- takuneqarsinnaavoq. Kisitsisit 2022-imi kisitsisinut assersuunneqarsinnaapput. Taamaattoqarnera nunarsuaq tamakkerlugu tarnikkut katsorsaanerni nalinginnaasuvoq. Suiaassutsikkut agguataarsimaneq taanna iliuuseqarfiginiarlugu Angut qulequtsiullugu suliniut, 2022-imi ilinniartut angutit akornanni nalerisimaanerup annertunerulersinnissaa angutillu amerlanerusut katsorsartinnisaannik siunertaqartoq, Qinngornermit aallartinneqarpoq. Suliniummi tamatumani ilaatigut video- angutit marluk tarnikkut peqqissutsiminnut tunngatillugu ikiortissarsiniarnermi nammineq misilittakkat pillugit ammasumik ilumoortumillu oqaloqatigiinnerat-saqqummiunneqarpoq.

Katsorsartinnissamut neqeroorummi ajornartorsiutit

Ilinniartunut, ilinniakkaminnik naammassinnissinnaanermut unammilliisumik tarnikkut ajornartorsiueqartut misigisunut, tarnikkut katsorsaanermik neqeroornissaq, Qinngornermi siunertaavoq. Tamanna ilinniartut ajornartorsiut ilinniarnerninnut toqqaannartumik toqqaannanngitsumilluunniit attuumassuteqarpat saaffiginnissinnaanerannik isumaqarmat, ajornartorsiutit ilinniartut ikiorneqarnissamik kissaataat assigiinngiaaqaat. Neqeroorutitta ilinniartut pisariaqartitaannut inerisarlugillu naleqqussarnissaat siunertaralugu, ilinniartut ajornartorsiutinik sunik saaffiginnissuteqartarnerat tunngavigalugu paasissutissanik katersinissaq, Qinngornermi pingaartipparput. 2023-imi Qinngornermi katsorsaanerit takussutissiami 5-imi takutinneqarput, takussutissiamilu 6-imi 2022-imi ajornartorsiutit ilinniartunit ikiorserneqarqunermik kissaateqarfiunerusartut 15-init takutinneqarlutik. Takussutissiami 5-imi naatsorsueqqissaarnermi kisitsisit Danjournalimeersuupput, takussutissiamilu 6-imi paasissutissat 2021-imi allagaatinut qarasaasiakkut nalunarsuiffimmit Kingo-meersuullutik. Danjournalimut ikaarsaarnermi ilinniartut sutigut ikiortissarsiorarnerannut kiisalu ajornartorsiutit suut katsorsarneqartarnerannut tunngatillugu, 2024-imi paasissutissanik katersinerup nanginnissaa naapertuutissaaq. Tamanna Qinngornermit neqeroorutaasut ilisimaneqarnerulernissaannut kiisalu neqeroorutinik nalimmassaanissamut tunngatillugu naapertuuppoq.

Katsorsartinnissamut utaqqineq

Ilinniartup Qinnqornermut qinnuteqarneraniit oqaloqatigiinnerit allartinnissannut utaqqisarnerup sivikillinissaa, 2021-imi annertuumik ukkanneqarpoq. 2021-imi utaqqineq sap. ak. aqqaneq marluk pallillugit utaqqinermit sap. ak. marluk sisamallu akornat (77%-it) pallillugu sivikillineqarpoq. Utaqqisarnerup sivikillinera, maleruagassanik nutaanik atuutilersitsinikkut suliasamullu pingaarnermut- katsorsaarnermut ersarissunik toqqammavissiinikkut- iluatsippoq. Utaqqisarnerup sivilissusaa taanna 2022-imi 2023-imilu attanneqarpoq.

Aggustimi septembarimilu ilinnialernermut atatillugu qinnuteqaatini aporfeqarnerup kingunerisaanik, decembarimi januaarimilu sivilissusumik utaqqisarneq allanngunngilaq. Katsorsaasut oqaloqatissaat aggustimi, septembarimi oktobarimi novembarimilu naamatittarmata, utaqqisarnerup decembarimi januaarimilu sap. ak. arfinillit pallillugit sivilissornerata kingunerisaanik utaqqisut amerlerujussuartarput.

Utaqqinerup nalinginnaasumik sivikillinissaa siunertaralugu, 2023-imi nutaamik iliuuseqartoqarpoq. Oqaloqateqarnissamik qinnuteqartunut aallarniutitut oqaloqatigiinnissamut qaaqqusissutit tiguneraniit ullut suliffiusartut pingasut qaangiutsinnagit tigusimanagerata uppersarnissaa piumasaqaataavoq. Piffissaliussaq sioqqullugu ilinniartuq akinngippat oqaloqatigiinnissaq unitsinneqassaaq ilinniartorlu qinnuteqaqqissinnaanermik ilisimatinneqassalluni. Taamaalluta utaqqisut sinnerisa oqaloqatigiinnerit aallartinissaannut piareersimasut pisariaqanngitsumik utaqqinissarluat pinngitsoortissavarput. Iliuuseqarnermi nalunaaqqaaratik takkutinngitsoortartut ilkisinniarnissaat eqqarsaataavortaaq.

Tamatuma saniatigut qinnuteqartut aliasuutiminnut ikiorneqarnissamik pisariaqartitsisut, qinnuteqartut naammaleraangata ataatsimoortuni aallartissinnaanersigut, 2023-imi qarasaasiakkut ataatsimoortunut neqeroorutit siulliit katsorsartinnissamut utaqqisarnermut sunnuteqarnerat takuneqarsinnaasut, Qinnqornermit ingerlanneqarput. Taamaaliornikkut katsorsaasut marluk ataatsikkut arfineq pingasut pallittunut katsorsartinnissamik neqeroorsinnaanngorput.

Ukioq naallugu sap. ak. sisamani utaqqisarnissamik aalajangiusimatitsisussanittaaq suliniuteqartuarpugut. Tamatuma saniatigut ilinniartunut utaqqisunut neqeroorummik inerisaasoqarpoq (immikkoortoq aallartittunut tunngasoq takuuk). Maani piffissami sivikitsumi sulisut amigartarmata, utaqqinerup sulisut taarsaannerannik sunnerneqartarnerattaaq, maluginiarnissaa pingaaruteqarpoq. Tamatuma saniatigut utaqqisarnerup sivikillinissaanut suliniutini, sulisut nalerisimaarnissaannut imal. katsorsaarnermut pitsaassusaanut akerliussamik akuersiinnannginnissaq pingaaruteqarpoq. Neqeroorutitta pitsaassusaat ilinniartut qaffasissumik pitsaassusilittut naliliinerannik tunngaveqarpoq. Pitsaasunik neqeroorsinnaajumalluni inerisaasinnaajumallunilu, sulisullu taarsaannerulernerat akiorniarlugu, sulisut nalerisimaarnerat pingaarutilittut naliliivigisariaqarpoq.

Ingerlaneramik naliliineq

Oqaloqatigiinnerit naammasisaangata, ingerlanerup naliliiviginissaanut immikkoortut arfinillit ilinniartunut tamanut akeqqusarpagut. Naliliineq- ilinniartut attavimmik/[link](#) naliliisitsinitsinnut akissuteqarfigisinnaasaminnik nassinneqarnerisigut- ingerlanneqartarpoq. Kinaassusersiortoqaqqunagu akissutini kinaassuseq isertuunneqartarpoq,

immikkoortuni tamani qanoq annertutigisumik isumaqataannginnerup/isumaqataanerup nalaagut krydsiliinikkut akissuteqartoqassaaq. Tamatuma saniatigut oqaaseqaasiortoqarsinnaavoq.

2023-imi naliliinerit, tarnip pissusaanik immikkut ilisimasalittut pisortaagallartumit pissarsiarineqarsinnaasimangillat. Naliliinernik naliliinissaq kiisalu neqeroorutitta pitsaassusaannik qaffassaasinnaanissaq nutaanillu inerisaanissaq siunertaralugit, malitseqartitsinissaq, tarnip pissusaanik immikkut ilisimasalittut pisortanngorumaartussap suliaasaatut naapertuuttut innersuussutaavoq. Naliliinermi immikkoortut takusinnaanissaannut 2022-imi ukiumoortumik nalunaarusiaq innersuussutaavoq.

Katsorsaanissamut toqqammavissineq

Qinngornermi katsorsaanermi toqqammavissat, maleruagassanik sukumiisunik 2021-imi suliarineqartunik naliliivigineqartarlutillu nalimmassarneqartartunik aallaaveqarput. Maleruagassat nutaat 2021-ip aallartinnerani atuutilersinneqartuni pingaarnertut anguniakkat marluupput: 1. Ilinniartunik qaffasissumik pitsaassusilimmik pilertortumillu katsorsanissamik qulakkeerineq. 2. Katsorsaasut sulinerminni pitsaasunik atugassaqartinneqarnissaannik qulakkeerineq.

Ataatsimut isigalugu; oqaloqatigiinnissat ilinniartup ajornartorsiutaanik qulaajaanissaq siunertaralugu, nal. ak. aappaata affaani aallarniutitut oqaloqatigiinnertallit aallartinnissaannut maleruagassat siusinnerusukkat atuutilersinneqartut atorneqarput. Aallarniutitut oqaloqatigiinneq tunngavigalugu ilinniartuq peqataatinneqarnissamut – peqataatinneqannginnissamullu piumasaqaatitut aalajangersakkat tunngavigalugit eqqortumik ikiorserneqarsinnaanersoq, katsorsaasup naliliivigissavaa.

Maleruagassat nalunaaqqaarani takkutinngitsoornernut takkussinnaanani lu nalunaarnernut toqqammavissanik ima qarputtaaq. Sullitap nalunaarani aappasanik takkutinngitsoornerani oqaloqatigiinnerit naggaserneqartarput, sullitarluni neqeroorummik sulii pisariaqartitsisutut misigiguni qinnuteqaqqissinnaanermut periarfissaqarneranik ilisimatinneqartarluni. Peqataasinnaanani nalunaarnerni maleruagassat 2023-ip ingerlanerani nalimmassarneqarmata, tulleriinni marlunni aggersinnaanani nalunaarnermi, aggersinnaannginnermut tutsuiginartunik patsisissaqanngippat, oqaloqatigiinnerit unitsinneqarsinnaapput. Katsorsartinnerup/oqaloqatigiinnerit ingerlaneranni marloriarluni aggersinnaanani nalunaarnermi, sullitap katsorsartinnerup nanginnissaanut kajumissusaa periarfissaalu qulaajaaviginiarlugit, katsorsaasup tarnillu pissusaanik immikkut ilisimasalittut pisortap akornanni oqaloqatigiissutigineqassaaq. Nalunaaqqaarani takkutinngitsoornerni takkussinnaanani lu nalunaarnerni toqqammavissani, oqaloqatigiinnernik sullitap katsorsaasumullu isumalinnik ataavartumik ingerlatsinissaq, kiisalu ilinniartup utaqquisup ilinniartup allap, piffissami pineqartumi kajuminnani imal. piffissami tamatumani imminut katsorsanissamut periarfissaqarani, katsorsaasup piffissaanik tigusinera pissutigalugu, ilinniartup pisariaqanngitsumik sivisuallaamik utaqqinnginnissaanik qulakkeerinissaq siunertaapput.

Oqaloqatigiinnerit qulit pallillugit amerlassuseqartussaanerisut toqqammavissiaq sulii malinneqarpoq utaqqinerullu sivisussusaanut- sullitap tunniusimappata kajumippatalu- oqaloqatigiinnerit pitsaassusaannut tunngatillugu pissusissamisoortutut naliliivigineqarluni. Pisuni immikkut ittuni katsorsaasoq oqaloqatigiinnerit amerlinissaasa

pisariaqarneranik naliliippat, tamanna tarnip pissusaanik immikkut ilisimasalittut pisortamut oqaloqatigiissutigineqarsinnaavoq. Taamaattoqartarnerali qaqutigooqaaq.

Suliniut Mindhelper.gl

Annilaanganermik ajornartorsiuteqarnerup annertuumik atugaanera tamatumunngalu ikiorserneqarnissamut periarfissaqannginneq tunngavigalugit, tarnip pissusaanik immikkut ilisimasalittut pisortaq Bjørn Noer, nunatsinni nittartakkamik- annilaanganeq pillugu paasissutissanik ajornanngitsumik pissarsiassanik inerisaanissaq, kiisalu ilinniartunut taamatuttaarlu nunatsinni innuttaasunut allanut tamanut, annilaangalersarnermik pitsaaliuinissamut annikillisaanissamullu qarasaasiakkut neqeroorummik inerisaanissaq pillugu suleqatigiinnermik aallartitsinissamut periarfissaq misissorniarlugu, Danmarkimi Center for Digital Psykiatri-mut (CEDIP) aattaveqarpoq. Mindhelper.dk, 2016-imi CEDIP-imit saqqummiunneqarpoq, ukiullu ingerlanerini angusaqarfiulluartumik sunniutaa atorsinnaaneralu naliliivigineqarlutillu pitsanngorsarneqarput. Nittartagaq- ilaatigut annilaanganeq pillugu paasissutissarpassuarnik atorsinnaasunik imaqarpoq, qarasaasiakkullu annilaanganermut tunngatitamik: Mindhelper-skolen.dk neqerooruteqarluni. CEDIP-imik suleqateqarnissaq, ilinniagaqassutsikkut pitsaassuseq qaffassissoq sukumiisorlu tunngavigalugit toqqarneqarpoq, nunatsinnilu innuttaasut arlallit Mindhelper.dk-mik atuisooreernerat pitsaasutullu naliliinerat patsisaaqataalluni. 2021-imi Mindhelper.dk nunatsinni inunnit 4500-it missaanniittunit alakkarneqarsimavoq.

2022-i naalersoq CEDIP-ip AQQUT-llu akornanni Mindhelperi kalaallisuaanik inerisaanermi suleqatigiinnissaq pisortatigoortumik isumaqatigiissutigineqarpoq, taannalu februaarip allaqqaataani 2024 saqqummiunneqarluni. Suliniut tarnip pissusaanik immikkut ilisimasalittut pisortamit Bjørn Noer-imit aqunneqarpoq, suliniummilu suleqatigiit tassaapput: Jakob Mejhlholm (suliniummik aqutsisoq, CEDIP), Linn Søndergaard Lindegaard (tarnip pissusaanik immikkut ilisimasalik, CEDIP), Mark Buskbjerg (attaveqatigiinnermi siunnersorti, CEDIP) kiisalu Magnus Ankersen (attaveqatigiinnermi siunnersorti, CEDIP). Aqutsisoqatigiit tassaapput: Christine Tønnessen aamma Lisbeth Thisted (suliniummik pisortaq, CEDIP). Suliniummik malinnaatitaasut tassaapput: Mia Olsvig Møller (tarnip pissusaanik immikkut ilisimasalik, Isumaginninnermut Aqutsisoqarfik), Vibe Schytz (tarnip pissusaanik immikkut ilisimasalik, nunatsinni tarnimikkut nappaatilinnut qitiusumik imm.) kiisalu Laila Hedegaard Pedersen (immikkoortortami aqutsisoq, Ilisimatusarfik). Kalaallisuaa maanna [Mindhelper.gl](https://mindhelper.gl) -imi alakkarneqarsinnaavoq paasissutissallu tamarmik kalaallisut danskisullu pissarsiassaallutik. Paasissutissat tamarmik misissorneqarlutillu nunatsinnut/ kulturitsinnullu naleqqussagaapput.

Piffissaqarnermi/kajuminnermi qarasaasiakkut ikorfartoqatigiinneq

Nunatsinni aqqutissiuussisunut ilinniartitsisunullu tamanut qarasaasiakkut ikorfartoqatigiinnissamik/ supervision neqeroorut 2022-imi inerisarneqarpoq. Naapertuuttumik neqerooruteqarsinnaaniarnitsinni najoqqutassaq saaffigineqartut atorsinnaasaat 2023-ip ingerlanerani inerisaqqinneqarpoq. Ikorfartoqatigiinnissaq aqqutissiuussisunit

ilinniartitsisuniillu annertuumik ujartorneqaraluaq, ikorfartoqatigiinnissanut ikittuinnaat- tamatigullu tamaasa takkuttarnerat, 2022-imi misilittakkat takutippaat.

2022-ip ingerlanerani sap. ak. allortarlugit ikorfartoqatigiinnernut, ilinniarsimasutut ilinniartunut qanimut attaveqartutut, katsorsaasunik Qinnqornermeersunik marlunnik peqateqarluni ikorfartoqatigiinnerni, kiisalu nunarput ilinniarsiillu akimorlugit suleqatit- taamatut misigisaqartarnissaat naatsorsuutigineqarsinnaammat assingusunillu ajornartorsiuteqartarsimassammata- siunersioqatigiinnerni suleqatiniillu isummorsorfigineqarnerni peqataanissaq periarfissaasimavoq. Taakku tassaasinnaapput ajornartorsiutit- soorlu ilinniartunik oqaloqateqarnernut misigissutsikkut oqimaatsunut iliuuseqarfiginninneq imal. qanoq ilionnikut ilinniartunik kajumilersitsisinnaaneq. Ikorfartoqatigiinneq nittartagarput Aqqut.gl aqqutigalugu toqqaannartumik attavikkut- Microsoft Teams aqqutigalugu- ataatsimiinneq peqataaffigineqarsinnaavoq.

Angalalluta ilinniarsiinnit neqeroorummik nittarsaassinitinni, neqeroorut pillugu oqaatigineqartut qisuariaatillu assigiinngitsut tunngavigalugit ikorfartoqatigiittarneq sulit annertuumik ujartorneqarpoq, tamatumali ulapaarfiusumi piffissaqarfiginissaa ajornakusoortinneqarluni.

2023-imi pinerit tamaasa, ilinniakkamik tunngaveqarluni katitikkat assigiinngitsut ilinniartitsisunut aqqutissiuussisunullu naapertuuttut pillugit, naatsumik saqqummiussinernik aallarniuteqartarluta, neqeroorut naleqqussarparput. Taakku tassaasinnaapput tungiuisutut nukissaarunneq, eqqarsartaatsikkut peqqissuseq, oqaloqatigiinneq ajornakusoortoq il.il. Tamatuma kingorna maanna peqataasut arlaata ajornartorsiutigisaanut- qulaani nassuiarneqartutut- ikorfartuisoqarsinnaavoq. Tamatuma saniatigut, nittartagarput aqqutigalugu ilinniarsiinnit saqqummiussisarnikkut, neqeroorut sulit pilersaarutigaarput. Siunissami nutaarsiassivitsinnik pisartunut tamanut mailikkut eqqaasitsissummik nassiussisalissaagut, tamaallutik amerlanerusut ikorfartoqatigiinnernut peqataasinnaanissaminut pingaarnersiullutik tulleriiaarlutillu pilersaarusiorsinnaanissaat neriutigaarput. Periusaasoq saqqummiussinermik ilaqartilertugut allanngortitsinerput, ikorfartoqatigiinnissani tamatigut katsorsaasut ikorfartoqatigiissitsisut annertunerusumik piareersaateqarnissaannik piumasaqaatitaqarpoq. Taamaammallu qaammammut ataasiarluni ikorfartoqatigiittoqartarluni. Ullut ikorfartoqatigiiffissat sammisassallu nittartakkatsinni takuneqarsinnaapput.

Annaasaqarsimasunut qarasaasiakkut tapersersoqatigiiffik

Qinnqornermi ulluinnarni sulinitinni, ilinniartut amerlaqisut aapparisamik, ilaquttanik imal. ikinngutinik nappaammut, ajunaarnermut imal. imminut toqunnermut annaasaqarnerup kingorna aliasunnermik ilungersuuteqartut nalunngilarput. Taamaammatt katsorsaasut sisamat 2022-imi aasaaneraniit Aliasunneq qulequtsiullugu qarasaasiakkut annaasaqarsimasunut tapersersoqatigiiffimmut najoqqutassamik inerisaapput. Katsorsaasut taakku sisamat inerisaanerat tunngavigalugu 2023-imi annaasaqarsimasut tapersersoqatigiit siullermeerlutik qarasaasiakkut naapipput. Taama ingerlatsineq iluatsilluarpoq tamatumalu kingorna tallimariarluni ingerlanneqarluni. Annaasaqarsimasut tapersersoqatigiit allat marluk 2024-imi upernaakkut aallartipput. Eqimattani taakkunani aqutsisut aallaqqaammut tassaapput katsorsaasut marluk tamatuminnga inerisaasimasut. Eqimattanik aqutsisussarsiniarnissaq, ilinniartitsinermut

periusissiaq annaasaqarsimasunut tapersersoqatigiinnik aqutsisutut misilittagallit ilitersuisoralugit ilinniartitsinikkut qulakkeerneqarpoq. Taamaalillutik Qinngornermi katsorsaasut sisamat maanna annaasaqarsimasunut tapersersoqatigiinni aqutsisutut misilittagaqalerput, tallimassaallu ilinniartinneqarluni. Periutsimi tamatumani katsorsaasut arlallit eqimattani aqutsisuusinnaammata najoqqutassarlu katsorsaasut taarseraatissappata sunnerneqarnerlunnginnerussammat, Aliasunneq qulequtsiullugu annaasaqarsimasunut tapersersoqatigiiffiup Qinngornermi neqeroorutaajuarnissaanik qulakkeerinissaq siunertarineqarpoq. Annaasaqarsimasunut tapersersoqatigiit kingullermik naapinneranni katsorsaasut kalaallisut oqaasillit aqutsisuupput, siunissami ilinniartut annaasaqarsimasunut tapersersoqatigiinni danskisut imal. kalaallisut oqaasilinnik katsorsaasulinni peqataanissamik toqqaasinnaangornissaat anguniagaavoq. Annaasaqarsimasunut tapersersoqatigiit danskinik katsorsaasullit nutserisoqartarput.

Annaasaqarsimasunut tapersersoqatigiiffimmi aqutsisut ingerlatsineq tamakkerlugu aalajangersimasumik sammisaqarluni ilisimatusartumit Lene Larsenimit, Danmarkimi Nationale Sorgcenterimeersumit, nammineq aningaasaateqarfinnit qinnuteqarnikkut aningaasartuutunut matussutissanik pissarsisumit ikorfartorneqarput. Suleqatigiinnissamut isumaqatigiissut taanna- annaasaqarsimasunut tapersersoqatigiinnik ingerlatsinermut, najoqqutassamut tapersersoqatigiinnillu aqutsisut sulinerisa pitsaasusaannik qulakkeerisutut- nalissaqanngilaq.

Tapersersoqatigiinni aqutsisut annaasaqarsimanermi aliasuuteqarnerup iliuuseqarfiginissaanut, nunatsinni innuttaasut amerlanerusut periarfissinneqarsinnaanissaat anguniarlugu inerisaqqippu. Maanna inerisaavigineqarput: 1) ilinniartinnut soorlu højskolinut, Majorianut ilinniarnertuunngorniarfinnullu annaasaqarsimasunut suleqatigiissuteqartitsinernik/workshop neqeroorsinnaalernissaq. 2) ilinniagaq pillugu siunnersortinut najugaqarfimmilu perorsaasunut; atuartunut ilinniartunullu annaasaqarsimasunut attaveqartunut ikorfartoqatigiissitsinerit/supervision, 3) aallartisartut ataavartumik ingerlasut pingasukkaartut, sullitat annaasaqarsimasunut tapersersoqatigiiffimmi aallartinnissamut utaqqineranni, eqimattakkuutaarlugit- aliasunneq pillugu aallarniutaasumik qarasaasiakkut ilinniartissinnaanissaat.

Sussanne Vendelbo tarnip pissusaanik immikkut ilisimasalittut sulisorisatta, lektori Anja Hvidtfeldt Stanek Syddansk Universitetimi tarnip pissusaanut Institutimeesoq suleqatigalugu, atuisunik peqataatitsineq ilinniartullu annaasaqarsimanermi aliasunnerup iliuuseqarfiginissaanut pisariaqartitaannik kissaataannillu misissueqqissaarneq, qitiutillugit misiliutitut suliniut naammassivaa. Siunertamut tamatumunnga Kalaallit Nunaanni Ilisimatusarnermi Siunnersuisoqatigiit ilisimatusarnermik siuarsaanissamut aningaasateqarfimmi aningaasanik pissarsivugut. Nalunaarusiaq 2024-i aallartilaartoq saqqummiunneqarpoq nittartakkatsinnilu pissarsiassaalluni: <https://aqquut.gl/aqqut-pillugu/ukiumoortumik-nalunaarusiat/>. Tapersersoqatigiinni peqataasut isummersuutiminni aliasuummik allanut avitseqateqarneq, aliasuummik allanut taamatulli atugalinnut oqaluuserisinnaangornera assut iluaqutaasimasooq oqaatigaat. Misiliutigalugu suliniummit ilisimalikkat, annaasaqarsimasunut tapersersoqatigiiffik pillugu paasissutissiinernut pitsaassutsimillu qulakkeerinermut, ataavartumik ingerlasutut, annaasaqarsimasunut tapersersoqatigiiffimmi peqataasut pisariaqartitaannut kissaataannullu atatillugu inerisarneqartutut isigineqartussamut atorneqartarput.

Annilaanganermik ajornartorsiutilinnut tapersersoqatigiiffik

Annilaanganerup ilinniartut akornanni tarnikkut ajornartorsiutitut nalinginnaanera, ilinniartuniillu saaffiginnissutaagajunnera takusinnaavarput. Tamanna qarasaasiakkullu annaasaqarsimasunut tapersersoqatigiiffik pillugu misilittakkat pitsaasut tunngavigalugit, qarasaasiakkut annaasaqarsimasunut tapersersoqatigiiffimmik inerisaaniarluta 2023-imi aalajangerpugut. Qinnigornermi suliniuteqarlutik suleqatigiittussanik- eqqarsaatit, misigissutsit, pissusilersorneq timillu oqariartuutai tunngavigalugit katsorsaariaaseq tunngavigalugu katsorsaannermi najoqqutassamik, nunatsinni qarasaasiakkut ingerlatsineri atugassamik naleqqussaasussanik pilersitsisoqarpoq. Neqeroorut annaasaqarsimasunut tapersersoqatigiiffimmut assingussaaq. Ilinniartut uatsinni neqeroorummik ujartuisut nittartagarput aqqutigalugu qinnuteqassapput tassanilu sutigut ikiorserneqarnissamik naatsorsuuteqarnertik nalunaarlugu. Ilinniartut annilaanganeq pillugu saaffiginnittut, ataatsimoortuni peqataanissamut soqutiginninnertik pillugu attavigineqassapput, katsorsaasumiillu tassunga innersuunneqarlutik. Annilaanganermik ajornartorsiutilinnut tapersersoqatigiiffiup siulliup nutaanik misilittagaqarfiligassatta inerisaqqillugulu naleqqussagassatta, 2024-ip aallartisimalernerani aallartinneqarnissaa naatsorsuutigineqarpoq.

Innersuunneqarani siunnersortinnissamut neqeroorut

2023-mi Qinnorneq toqqaannartumik oqarasuaateqalerpoq, ilinniartunit katsorsaasumut siunnersuinissaminik aqqutissuinissaminullu piareersimasumut attaveqalersinnaallutik. Innersuunneqaaqqaarani siunnersortinnissamut neqeroorut, pisariaqartitsisut tamarmik pisariaqartitamik tarnikkut ikiorserneqarnissamik neqeroorfigineqarsinnaaqqullugit, neqeroorutitta kikkunnit tamanit ilisimaneqalernissaanik anguniagaq aallaavigalugu pilersinneqarpoq.

Innersuunneqaaqqaarani siunnersortinnissamut neqeroorut ataasinngornerit tamaasa nal. 12-ip 13-illu akornanni ammasarluni aallartippoq. Piffissaq taanna- ilinniartut ilinniartitsiviusoq qimannikkaluarlugu sianernissamut pitsaanerpaamik periarfissinnissaat siunertarlugu toqqarneqarpoq, taamaammallu ilinniartut amerlanersaasa ullup qeqqarnerisa nalaaniikkunaruni. Tarnikkut peqqissutsimut tunngatillugu ikiortissarsiniarneq ilaannut sulip paquminartutut misigineqarmat, piffissaq taanna ilinniartut sianersinnaanissaannut tunngatillugu pitsaanerpaatut naatsorsuutigineqarpoq.

Neqeroorut ilisimalersinniarlugu paasissutissat siammarteqqaarneqassammata, aallaqqaammut sianertut killeqarnissaat naatsorsuutigineqarpoq. Taamaammatt ukioq naalersoq ataasinngornerit tamaasa neqeroorut inuit attaveqatigiittarfiisigut takoqqusaarutigisaleratsigu sianertoqartalerpoq. Tamatuma 2024-imi nanginnissaa naatsorsuutigineqarpoq.

Aallartisarneq

Aallartisarneq neqeroorutaavoq 2023-ip ingerlanerani Qinnqornermut saaffiginnittut tamarmik sapinngisamik piaarnerpaamik- ajornanngippallu sap. ak. marluk qaangiutsinnagit ikiorserneqarnissaat anguniakkatut siunnerfigalugu inerisarneqartoq. Aallartisarneq- sap. ak. ataasiarluni sammisanik assigiinngitsunik tarnip pissusaanut tunngasunik, ilinniartup assigiinngitsunik ilisimasaqarfigilersinnaasaanik, immaqalu nammineq qanoq inissisimanini pillugu isumaliulersitsinnaasunik saqqummiussinerni peqataanissamut- neqeroorutaavoq. Sammisat saaffiginnissutip suunera apeqqutaatinnagu amerlanernut suut naapertuussinnaanerat tunngavigalugu toqqagaapput. Qinnuteqaatip tigusimanera pillugu ilinniartunut nalunaarummi, nittartakkatsinnut- aallartisarneqarnissamut neqeroorutip suuneranik nassuiaatitalimmut, Microsoft Teams-imullu attavikkut peqataaffiisinnassamut toqqaanartumik attavik/link- pissarsiarisallissavaat. Taamaaliornikkut qinnuteqartut tamarmik saaffiginninnerminniit kingusinnerpaamik sap. ak. ataatsip qaangiunnerani uatsinniit tusagaqarsinnaanissamut periarfissinneqarnissaat qulakkiissavarput. Aallartisarneq 2024-ip aallartisimalernerani sammisassanit siullernit sisamaasunit: 1. Kajuminneq naleqartitallu, 2. Eqqarsaatit misigissutsillu, 3. Annilaanganeq 4. Annaasaqarneq aliasunnerlu aallartinnissaat naatsorsuutigineqarpoq. Saqqummiussinerit immikkut tamarmik nal. ak. ataatsimik sivilissuseqassapput sammisallu allanngorassallutik, taamaaliornikkut utaqqinnermi sammisani assigiinngitsuni peqataasoqarsinnaassalluni.

Ukioq qaangiuttoq eqikkaavigalugu

Ilinniartunut Siunnersuisarfik 2023-imi Qinnqornermik atserneqarpoq aqqissuussaannikkullu AQQUT -ip ataani inissisimalluni.

Ukioq 2023 tarnip pissusaanik immikkut ilisimasalittut pisortap Bjørn Noerip soraarniuteqarneranik novembarillu ulluisa 30-ianni sulionnaarneranik naggataarneqarpoq. Suleqatigiit Bjørnip inerisaaneranut ilinniartullu sulisullu nalerisimaarnissaannik ukkassineranut qujanaqaat. Tarnip pissusaanik immikkut ilisimasalittut pisortanngortussap tikilluaqqunissaa qilanaaraarput.

Qinnqornermik ukiuni siuliini 2023-imilu aamma tarnikkut ajornartorsiutinik pitsaaliuinnermik katsorsaannermillu ukkassivoq. Tamanna 2023-imi neqeroorutinik nutaanik arlalinnik inerisaasoqarneranik aallartitsisoqarneranillu- neqeroorutaareersullu naliliivigineqartarlutillu inerisaqqinneqartarnerannik kinguneqarpoq.

2023-imi tarnip pissusaanik immikkut ilisimasalik Sussanne, annaasaqarsimasunut tapersersoqatigiiffimmut neqeroorutaasumut misiliutitut suliniummik aallartitsimmat, AQQUT-mi ilisimatusarluni suliniummik siullermik aallartitsisoqarpoq. Aqqut-mut paasisimasaqarfittut annaasaqarsimasunut tapersersoqatigiiffimmi pilersitsineq inerisaanerlu, annilaanganermik ajornartorsiutilinnut tapersersoqatigiiffimmi inerisaanissamut periarfissiimmat Qinnqornermik-milu neqeroorutinut annertuumik pingaaruteqarmat, tamanna immikkoortortamut killiffiuvoq imaannaanngitsoq.

2023-imi annaasaqarsimasunut tapersersoqatigiiffiup pilersinneqarnerata saniatigut, Qinnqornermik- innersuunneqarani siunnersortinnissamut neqeroorummik, oqarasuaat sap. ak. tamaasa ammasartoq atorlugu toqqaanartumik katsorsaasumut Qinnqornermik-meersumut attaveqarfimmik aallartitsivortaaq.

2024-imut pilersaarutaasut tassaapput annilaanganermik ajornartorsiutilinnut tapersersoqatigiiffimmik aallartitsinissaq, Aallartisarnermik aallartitsinissaq ilinniarsimasunullu annaasaqarsimasunut tapersersoqatigiiffimmik piffissaqarnermilu/kajuminnermilu ikorfartoqatigiinnermik inerisaaqqinnissaq. Mindhelper.gl, 2024-ip aallartisimalernerani saqqummiunneqarpat imminut ikiornissamut akeqanngitsumik ikiorserneqarsinnaanissaq, annilaangasarneq pillugu ilisimasaqalernissaq annilaanganermullu ersiutit pitsaalinissaannut iliuuseqarfiginissaannullu iliuusissanik aalajangersimasunik ilikkarnissaq, tamanut periarfissanngussaaq. Qinnorneq; suliassatta qiterisaanik- tassalu ilinniartut nalerisimaarnissaat ukkallugu, katsorsaaneq qaffasissumik pitsaassusilik sivikitsumillu utaqqineq qitiutillugit, tarnikkut katsorsaarnernik naliliiuassaaq pitsanngorsaajuarlunilu.

2023-imut qujanaq

Ilanngussaq 1

Piffissaqarnermi/kajuminnermi ikorfartoqatigiinnermi siunertaq tassaavoq sinerissami aqqutissiuussisut AQQUT-mit ataavartumik makkunatigut tapersersorneqarnissaat:

- Ilinniagaqassutsikkut siunersioqateqarneq
- Ilisimasani avitseqatigiinneq
- Misilittakkanik avitseqatigiinneq
- Najukkani attaveqatigiinnik pilersitsineq
- Aqqutissiuussinermi sammisat pillugit ilisimasani katersineq
Nuna tamakkerlugu AQQUT-mi sammisani aqqutissiuussinermilu sammisani naapertuuttunik ilisimatitsineq
- Nuna tamakkerlugu aqqutissiuussisunut atugassarititaasut takullugit, misigalugit paasillugillu
- AQQUT-mit iliuuseqarfigineqarsinnaasunittaq suussusersinissaq siunertaralugu aqqutissiuussisunik taakkulu ulluinnarni aqutsuini siunersioqateqarneq

Piffissaqarnermi/kajuminnermi ikorfartoqatigiinni sammisat siulliit tassaasimapput:

1. Aallartisarluni ataatsimiinneq: 15. februar nal. 14:00 – 15:00 / Jonna & Lone AQQUT-meersut. Sisamanit peqataaffiusoq.
 - Ikorfartoqatigiinnerit aallartinnissaannut imal. nanginnissaannut qanoq iliorsinnaavugut
 - Oqaluuserisassat qanoq suliarineqassappat
 - Ataatsimiiffissanik ullorsiutinut nalunaarsuineq
 - attavissanik nalunaarsuineq
 - attagigisartagassamik toqqaanissaq isumassarsiatsialaassaaq
2. Periarfissat allat, ass. AQQUT-ip nittartagaa: 15. marts nal. 14:00 – 15:00 / Jonna & Kulunnguaq AQQUT-meersut. Pingasunit peqataaffiusoq.
 - pingaartumik kisimiikkaanni siunersioqateqarnissamut suut periarfissaappat?
 - eVejledning qanoq atorsinnaavara?
 - aqqut.gl-imi ikiorneqarnissamut periarfissat
 - kina attavigisinnaavara?
3. Attaveqatigiittut ataatsimiinnerit iluaqutitaat: 12. april nal. 14:00 – 15:00 / Jonna AQQUT-meersoq. Pingasunit peqataaffiusoq.
 - attaveqatigiinni ataatsimiinnerup suut iluaqutitarai
 - attaveqatigiinni ataatsimeereernermi suut ajornannginnerulersarpat
 - siunissamut kissaatigisat pillugit attaveqatigiinneq
4. Ilisimasani avitseqateqarnerup iluaqutitai: 10. maj nal. 14:00 – 15:00 / Majoriaq Aasiaat. Arfinilinnit peqataaffiusoq.
 - kisimiinnginnerup iluaqutitai
 - attaveqatigiinnerup ingerlaannarnissaanut qanoq iliorsinnaavugut

- ataaveqatigiit ataatsimeereerneranni isumassarsiat nutaat

5. Unammilligassat qanorlu iliuuseqarfigineqarfiginissat: 14. juni nal. 14:00 - 15:00 /tarnip pissusaanik immikkut ilisimasalik Marcus QINNGORNEQ-meersoq. Sisamanit peqataaffigineqartoq.

- Aqqutissiuussisutut suut unammilligassaraagut
- Ikorfartoqatigiinneq/supervision atorparput?
- Aqqutissiuussinitsinni oqimaatsumik misigisaqarutta qanoq ililluta ingerlariaqqissaagut.

Ukiakkut ataatsimiinneq upernaakkut ataatsimiinnermit allaaneruvoq. Ataatsimiinnerit imarisaat tassaapput unammilligassat assigiinngitsut oqallisigineqarnerat.

1. Piffissaqarnermi/kajuminnermi ikorfartoqatigiinneq sisamanngorneq 24. august 2023 nal. 14:00. Peqataaffigineqanngitsaq.
2. Piffissaqarnermi/kajuminnermi ikorfartoqatigiinneq sisamanngorneq 28. september 2023 nal. 14:00. Aqqaneq marlunnit peqataaffigineqartoq.
 - Tassani unammilligassat aqqutissiuussisut siumortagaat eqqartorpagut.
 - Inuusuttut arlallit immikkut pisariaqartitsippat.
 - Aqqutissiuunneqarniat angajoqqaallu oqaloqatigiinnissanut takkutinngitsut.
 - Aqqutissiuussinnermi sakkussanik pioreersunik AQQUT-ip nittartagaani atugassanik katersineq.
 - Ilinniartunut nakorsap allagartamik uppersaasiaanik pissarsiniartarneq.
 - Piffissaqarnermi/kajuminnermi ikorfartoqatigiit immikkoortiterneqarnissaannik kissaateqarneq:
 - Meeqqat atuarfianni aqqutissiuussinuinnat
 - Majoriaq-mi aqqutissiuussisunuinnat
 - Inuusutissarsiuutinut qitiusumik ilinniarfinni aqqutissiuussisunuinnat
 - GUX-imi aqqutissiuussisunuinnat

Aqqutissiuussisut ikiortissamik pisariaqartitsinnerminni AQQUT attavigisarpaat. AQQUT tamatumani peqataarusuppoq. Piffissaqarfimmi/kajuminnermi ikorfartoqatigiinneq, ilinniarfiup suunera apeqqaatinnagu, aqqutissiuussisunut tamanut atuuppoq.

3. Piffissaqarfimmi /kajuminnermi ikorfartoqatigiinneq sisamanngorneq 19. oktober 2023 nal. 14:00. Aqqaneq marlunnit peqataaffigineqartoq.
 - Tamatumani ikorfartoqatigiinneq/ supervision oqaluuseraarput
 - AQQUT / QINNGORNEQ aqqutigalugu qaammammut ataasiarluni ikorfartoqatigiissinnaaneq/supervision.
 - Nukissaarussimagaanni ullut 14-ikkarlugit tarnip pissusaanik immikkut ilisimasalimmit namminersortumit ikorfartoqateqarnissap aqutsisumut qinnutiginnissaa periarfissaavoq.
 - Aqqutissiuussineq
 - Sap. ak. skemaliuussaq
 - saaffiginnissutit pinasuartariallit salliuunneqartarput (skemaliuunneqanngitsut)
 - Imminut paaraluni skemami piffissat ilaatigut pilersaarusiorfiusassanngillat.
 - Sakkussanik pioreersunik katersineq aallartimisaareerpoq.

Aqqutissiuussisut peqarunik AQQUT-mut nassiussinnaavaat.

4. Piffissaqarnermi/kajuminnermi ikorfartoqatigiinneq sisamanngorneq 30. november nal. 14:00. 13-init peqataaffigineqartoq.

- Tamatumani ikorfartoqatigiinneq/ supervision eqqartoqqipparput.
- Arlallit sakkussaminnik nutaanik pisariaqartitsigaluarlutik QINNGORNEQ-up piffissaqarnermi/kajuminnermi ikorfartoqatigiinnerinut peqataanissaq ajornakusoortippaat. Taamaattorli Outlook aqqutigalugu ataatsimiinnissanut aggersarneqartarnissaq kissaatigaat.
- Ilinniagaq pillugu siunnersortinut saaffiginnissutit.
- Saaffiginnissutit tamakkerlugit qanoq ataqatigiissaarneqarsinnaappat.
- Ullorsiutit
- Sap. akunnikkaarlugit skemamut ilanngussat
- eVejlledning aqqutissiuussisunit qanoq atorneqarsinnaava?
- Ilisimasanik avitseqatigiinneq
- Siunersioqatigiinneq
- Ikorfartuineq/tapersersuineq
- AQQUT-ip nittartagaa
- Sakkussat assigiinngitsut aqqutissiuussisunit atorneqarsinnaasut.

Ilanngussaq 2

AQQUT-ip peqataanissaa imal. najukkami attaveqatigisanik ataatsimeeqqateqarnissamut ikiuunnissaa kissaataappat, ataani nalunaarsorsimasuni AQQUT-mit kina illit kommuninni attavissaanersoq takuuk:

Kommuni	Akisussaasoq	E-maili
Avannaata Kommunia	Jonna Therkelsen	jthk@aqgut.gl
Kommuni Qeqertalik	Jonna Therkelsen	jthk@aqgut.gl
Qeqqata Kommunia	Helle H. Rosing	hhro@aqgut.gl
Kommuneqarfik Sermersooq	Kulunnguaq Korneliussen	kkor@aqgut.gl
Kommune Kujalleq	Paornáguak Lynge Hansen	paoh@aqgut.gl
Kalaallit Illui	Helle Hansen Rosing	hhro@aqgut.gl

Qarasaasiakkut- imal. sapinngisamik naapilluni ataatsimiinnissami pilersaarutaareersumi peqataasinnaavugut.